



14 di October 2020

Impactful Women Project Sixta Justa Cicilia “zuster Juliette”



1. Ken ta zuster Juliette prome cu a drenta e mundo di Religion

Zuster Juliette a nace dia 6 di Augustus 1938 na Boneiro, e la biba eyman te cu su 13 aña hunto cu su mama, tata y rumannan. Na su cas nan tabata resa regularmente pa un di su 7 ruman hombernan coverti un dia den sacerdote. Pero a resulta cu Juliette a coverti den zuster y niun di su rumanan homber a coverti den sacerdote.

Di un edad hopi jong zuster Juliette ta conta di a sinti un vocacion pa cu e bida religioso, por bisa cu a dedica su bida completo na Dios.

2. Zuster Juliette tin hobby cu ta haci den zuster Juliette su tempo liber/ priva?

Zuster Juliette a remarka cu ta dificil pa papia di un otro hobby cu no ta su trabou, mirando cu e ta trece dilanti cu su trabou a bira su hobby. Su concentracion semper tabata dios y comunidad. Den añanan anterior zuster den su tempo liber tabata canta den coro, skirbi un cantidad di poesianan. Actualmente cana serka di su cas den su vecinaderio a bira su momento di distrai su mente y mantene e curpa activo, ya cu segun zuster mente y fisico ta mes importante. Ademá di esaki ta lesa bukinan spiritual.

3. Ki estudio zuster Juliette a haci y con a drenta e ramo religioso?

Zuster Juliette a keda te 5de klas na Boneiro y despues a bin Aruba unda e la continua scol. Zuster Juliette a atende Maria College Mulo, abase di conseho di Seur e la bay termina esaki na Hulanda. Na hulanda e la bay interna na Reuver, Limburg. Na inicio tabata un periodo cu hopi nostalgia, tambe na mes un momento esaki tabata tambe e periodo unda cu e la cuminsa pensa riba su vocacion pa bira un slotzuster. Despues di Mulo e la bay

"kweekschool" (instituto pedagógico pa scol básico e época ey), unda e la termina esaki cu 20 aña di edad.

Despues di haal su "hoofdakte" zuster Juliette a inicia su carrera den e area di enseñanza na Boneiro como cabesante di un scol básico na Rincon.

Semper e tabata bezig cu organisacion di evento pa mucha y hobennan, unda e la ripara cu e kier a dedica su bida na Dios door di yuda su prohimo "*mi no kier a resa pa nan so, pero traha pa nan tambe*". Durante e 2 añanan cu e tabata na Boneiro e pensamiento pa bira seur a permanece.

Zuster Juliette a bay Hulanda bek unda e la haci 2 aña di noviciaat (vorming in het monastieke leven) na e congregacion di zusters Dominicanessen di Voorschoten. Zuster Juliette a tuma les di Ingles, obteniendo un certificado y a duna les di Ingles na un Mulo na Nijmegen. Prome cu bolbe Aruba zuster Juliette a realisa su "eewige belofte" (promesa eterno) dia 31 di juli na aña 1966 pa asina por regresa Aruba como religioso.



E mes un aña ey na Aruba e la cuminsa duna les na Mavo Maria College, e tabata duna les di engels, aardrijksunde, godsdienst (catehese) y maatschappijleer te 1978. Pafor di scol zuster Juliette tabata duna les di prome comunión entre otro.

Aña 1977 tabata e inicio di "Zusters Dominicanessen di Salida di Solo".

Na 1978 zuster Juliette a wordo nombra como e "cathechete na Aruba y na 1986 a haya e "totale zorg" di e Catechese na cual e la dedica su mes hunto cu otro 2 zuster di "salida di solo" cu ta representantenan di Catechese aki na Aruba.

Na aña 1990 zuster Juliette a obtene su tweedegraads MO den Teologia.

4. Con zuster Juliette ta balancia bida familiar y ta un zuster.

A dedica su mes completamente na dios y na comunidad. Cu un comienso no tan facil,

mirando cu su mama no a aproba di su escogencia pa bay den ramo di religion na inicio. Zuster Juliette ta conta cu mientras e tabata studiando e la wordo avisa cu e mester scirbi semper pa su mayornan den e caso aki su mama. Zuster Juliette tabata haci esaki, y pa un tempo largo no a ricibi contesta bek. E ta conta cu esaki tabata un aspecto dificil di a scohe entre su profesion y famia. Despues di algun tempo a ricibi carta bek di su mama y a keda semper agradecido pa cu esaki. E vocacion di un zuster ta encera hopi sacrificio.

5. Zuster Juliette tin reconocimiento/ logronan na zuster Juliette su number?

29 di April 1994 ex gobernador Olinda Koolman a otorga eremedaille di oro na zuster Juliette.

6. Zuster Juliette ta involvi cu instancia nan caricativo?

Zuster Juliette a dedica gran parti di su bida na enseñanza y formacion religioso di nos muchanan y hobennan aki na Aruba. Pa hopi aña zuster Juliette a traha e temanan di “catehese” pa scolnan catolico y tabata e persona pa organisa dianan di reflexion pa maestronan di scolnan catolico.

Como parti di vocacion, y su deseo pa yuda su prohimo. Semper a bishita scolnan basico catolico sigui cu bishita na cas den seno familiar. Pa sigui cu e contacto cu e estudiante den su seno familiar tabata hopi importante pa zuster Juliette.

Zuster Juliette tabata tin un programa “Jij Jesus” di grupo di hoben cu lo confirma, unda nan tabata papia over di diferente topico relaciona cu confirmacion via radio.

Ademas tabata organisa diferente actividad pa mucha y hobenan.

“Wardado di nos hubentud”

7. Zuster Juliette tin un mensahe pa e hende muhernan (hoben/Young professional) di Aruba?

E mensahe pa e hoben hende muher di awendia ta pa no lubida bo valor propio. Den e mundo actual ta importante pa recorda cu valor no ta bini di fama, di potret, di expone bo curpa pues cada un di nos tin un valor propio. Respet pa bo curpa y bo mes ta primordial y tin semper den mente dios y bo comunidad.

Dellanire Y. Maduro & Kimberly Kuiperi

Fuente:

- Entrevista personal cu zuster Juliette 21 Januari 2020
- <https://onzemanoparuba.wordpress.com/2007/05/28/zuster-juliette-dit-is-wat-ik-wil/>
- Revista Amistad Januari 1975

WOW Aruba
Women empOwering Women
wowarubainfo@gmail.com
<https://www.wowaruba.org/>

Zuster Juliette

IMPACTFUL WOMAN

SIXTA JUSTA CICILIA

Di un edad hopi jong zuster Juliette ta conta
di a sinti un vocacion pa cu e bida religioso,
por bisa cu a dedica su bida completo na Dios.

